

每週經課朗誦經文(巴克禮台語漢字)2013/09/15

共同經課 - 1 耶利米書四章十一節~十二節，二十二節~二十八節

11 彼時，欲有話對此個百姓及耶路撒冷講：「欲有熱熱的風對曠野光裸裸高的所在向我的眾百姓吹來，
唔是欲簸伊，亦唔是欲互伊清氣。12 欲有闊卡大的風爲著我吹來；今我閣欲發出判詞，來攻擊 in。」22
我的百姓愚戇，唔識我；in 是愚戇無聰明的子；行歹就夯(Gâu)，行好就預顛。23 先知講：我看地，看
啊，地是空空混沌；我看天，天亦無光。24 我看許個大山，看啊，in 攏振動，小山亦攏搖來搖去。25 我
閣看，看啊，攏無人；空中的飛鳥亦攏飛走。26 我閣看伊，看啊，肥的田變做拋荒的地；一切的城佇耶
和華的面前，因爲伊的大受氣攏總倒壞。27 因爲耶和華按呢講：全地的確拋荒，總是我無欲毀滅到盡。
28 因爲按呢，地欲憂悶，天頂也欲黑暗；我已經講伊，已經定著伊，的確無退悔，也無越轉意思唔做伊。

共同經課 - 2 詩篇十四篇

1 [大衛的詩，交互樂官。] 戇人心內講：無有上帝。in 趁邪惡，行可惡的事；無一人行好。2 耶和華
對天府落看世間人，欲看有明理者，有尋求上帝者抑無。3 in 攏歪斜，一概變做污穢；無人行好，連一
個亦無。4 做歹的人豈攏袂曉得嗎？in 吞食我的百姓，親像食餅，亦無求叫耶和華。5 in 佇遐大大驚惶，
因爲上帝佇義人的族類中。6 恁互喪鄉人的計謀變做見誚；總是耶和華做伊逃閃的所在。7 願以色列的
拯救對錫安出。耶和華救伊受掠的百姓倒轉來，彼時雅各欲快樂，以色列欲歡喜。

共同經課 - 3 提摩太前書一章十二節~十七節

12 我感謝互我有氣力的就是咱的主基督耶穌，因爲伊掠我做盡忠，設立我做差用。13 我前是謗瀆的，
窘逐的，侮慢的；總是我此號所做是出佇唔知唔信，才得著憐憫。14 閣咱的主的恩典是格外豐盛，互我
佇基督耶穌有信有疼的心。15 有一句話通信，通齊全接納的，就是「基督耶穌臨到世間，欲救有罪的人。」
其中我是第一歹。16 若是我得著憐憫，是因爲耶穌基督欲佇我第一歹的人顯明伊一切的吞悞，來做後來
信靠伊得著永活的人的模樣。17 願尊貴、榮光歸佇袂毀壞、看袂著、萬世代的王、獨一的上帝，到代代
無盡。阿們！

共同經課 - 4 路加福音十五章一節~十節

1 眾抽餉的及歹人啲就近耶穌來聽伊。2 法利賽人及經學士耦耦唸講：「此個人接納歹人，續及 in 食。」
3 耶穌設此個譬喻對 in 講：4 「恁中間甚麼人有一百隻羊失落一隻，豈無且放九十九隻佇山裡，去尋所
失落的，到得著嗎？5 已經尋著，就歡喜背伊佇肩頭頂，6 到厝，就聚集伊的朋友厝邊，給 in 講：『著
及我歡喜，因爲所失落的羊我已經尋著。』7 我給恁講，歹人中有一人反悔，就佇天裡也欲按呢爲著伊
歡喜，比爲著九十九個義人唔免反悔的閣卡歡喜。」8 「抑是甚麼婦仁人有十個銀仔，若失落一個，豈
無點燈，掃厝，勤勤尋到著嗎？9 已經尋著，就聚集伊的朋友厝邊，講：『著及我歡喜，因爲所失落的
銀仔我已經尋著！』10 我給恁講，歹人中有一人反悔，就佇上帝天使的面前爲著伊喜歡也是按呢。」